

■ PLED PER LA DUMENGIA

Partir – Pitir – Parturir – Partir

DA GISULA TSCHARNER

E tempo di partire..., en-tschaiva ina chanzun da Nadal veglia ticinaiusa. Partir, ir davent, sa metter sin viadi. Questa dimensiun vegn mintgatant emblidada, sper tut la romantica da las Festas glischontas, e sper la nunromantica da lezza notg, cur ch'il pop è naschi en uigl anstagl en chombra schubra, salidà da la biestga enstagl da la spindrera.

Per tgi èsi temp da partir, en la chanzun? Probablmain per ils pasturs ch'avevan udi il clom

da l'aunghel. Ma betg mo quels. Partir è stà il motto insumma en lezs dis ed emnas. Il giuven pèr Josef e Maria (ella en gravidanza fitg avanzada) han stuè ir davent da chasa e sa render a lur lieu burgais, suandond l'appel amministrativ da la regenza romana.

Partir – malruassaivladad, nunsegirtad, dubis. Ina nervusadad generala vegn a s'avair derasada en l'entira populaziun palestinaisa, perquai che tuts, betg mo quels dus, en stads sfurzads dad ir il medem di mintgamai a lur lieu origin. In marschim e vegnim e schemim.

Inquietezza er en la situaziun politica e sociala, perquai: Tgi fageva gugent quest viadi a pe sin cumond dals occupaturs romans? Ozendi fissi forsa in'occupaziun da l-US-Army, insanuas en l'Orient da l'ost...

Nunruassaivladad er pli lunsch davent en regiun Mesopotamia (oz = Irak), nua ch'intgins astronomes renumads han scuviert al tshiel ina conjunziun extraordinaria da dus planets gronds: cun preschas èni partids per esser preschents al lieu nua che savess nescher in uffant

cun in cosmogram usche signifigant...

Partir, ir davent, bandunar, sa render sin viadi cun preschas: Dapli anguscha che legria, crai jau. «Partir, c'est un peu mourir», di la sentenza francesa. Quai constat er per l'istorgia da l'uffant divin. Tut las segirtads han stuè murir avant che quella naschientscha ha gi lieu (dal reminent: er suenter, cun la fuga en l'Egipta p. ex.). Partir – parturir – pitir: Tut quai di il medem, sa metter sin viadi. Perquai e mes gavisch per l'ultima emna avant Nadal: Bun viadi!